

VOSKAMP ETA HEPPNER DESKALIFIKATU ONDOREN, ETAPA TRAVERSONIRENTZAT IZAN ZEN

Kontrolik gabeko esprinta


■ Hasieratik 14 txirrindularik osatutako ihesaldiak markatu zuen atzoko etapa. Azkenean, Voskampek eta Heppnerrek jokatu zuten garaipena, kontrolik gabeko esprintean. Baina epaileek deskalifikatu egin zituzten, eta garaipena Traversonirentzat izan zen.

Xabin Makazaga / Donostia

DIJON-GO helmugara bitarteko 172 kilometroak paseo hutsa izan ziren tropeleko gizon gehienentzat. Hamalau gizonetako taldeak haste-hastetik hanka egin eta etapa garaipena elkarren artean jokatzeko moduko tartea azkar lortu zuen. Atzean ziren Tourrari bizitasuna eman dioten guztiak, eta sailkapen nagusian dagoeneko ia dena erabakita dagoen arren, gastu handirik ez zuten egin atzo. Gaurko erlojupekoa zuten, nonbait, buruan. Kontrolez kanpo iristeko zorian izan ziren hamalau lehenak ez besté guztiak. Tourreko antolatzailerik ez zituzketen karreratik kanpo utziko, jakina. Baina irabazlearengandik 18 minutura sartu ziren 137 txirrindulari, batere zailtasunik gabeko etapari.

Ia kontrolez kanpo iritsi zirenez gain, hala ere, batere kontrolik gabe ibilitakoak ere izan ziren atzoko etapari. Christian Henn eta Jens Heppner (Telekom), Sergei Ustxakov (Politi), Arnaud Preot eta François Simon (Gan), Servais Knaben, Peter Van Petegem eta Bart Voskamp (TVM), Erik Dekker eta Rolf Sorensen (Rabobank), Marco Saligari (Casino), Mario Traversoni (Mercatone-Uno), Viatxeslan Ekimov (US Postal) eta Thierry Bourguignon (Big Mat) izan ziren etapako 14 protagonistak. Epika, komedia eta tragedia hor nonbait izan ziren horien ibilkeran.

Ia etapa osoa egin zuten 14 txirrindulariok lasterketaren buruan. Helmugarako 30 kilometro falta zirela Voskampek eta Heppnerrek ihes egin zuten, eta Ustxakov haien bila abiatu zen arren, Dijon bitarteko bidea bakarrean egin zuten aurreko biek. Atzeko 12ak ez ziren ondo moldatu —Telekom eta TVM taldekoek tira beharrik ez zutelako, eta gainontzekoen artean Rabobaneko biek baino ez zutelako tira benetan—, eta garaipena Voskampek eta Heppnerrek elkarren artean jokatu zuten. Ihesaldi epikoaren ondotik, baina, komedia etorri zen. Eta komeriak. Nahi eta ezin, Heppner Vos-



Voskamp eta Heppner atzoko esprintean.

PASCAL RAVANI / EPA

kampen gurrpilari jarraitzen, indarrak jada akituta biak hala biak... Metro pare baten faltan elkarren kontra jo zuten, eta Heppner lurrera erortzeko zorian izan zen. Voskamp aurretik sartu zen eta, leher eginda, merezi izan zuela pentsatuko zuen.

Tragedia (Voskampentzat) epaileen erabakiak ekarri zuen, helmugan aurrea sartu ziren biak deskalifikatzean. Ez zen esprint ortodoxoa izan, baina

txarkeriak baino gehiago ezinak eragin zuen ailegaera komikoa. Zigorra, aukeran gogorxea. Eta atzeko taldetxoan esprinta irabazi zuena, Mario Traversoni, pozez txoratzen: hirugarren helmugaratu eta etapa garaipena sakele- ra, alajaina. Hauek ere, dena den, ez zuten oso esprint jatorra egin. Ustxakovek hortzetako ederra ere hartu zuen ia, hesien kontra jotzeko zorian izan zen- eta. Kontrolez kanpo sartzeko

zorian izan zen tropelean Moncassin izan zen azkarrena. Baina aurreko hamabiak ere deskalifikatu eta garaipena Gan taldekoari ematea, soka gehiegi tenkatzea izango zatekeen. Atzo etaparen ondoren, txirrindulariek trena hartu eta Parisera joan ziren. Parisetik gertu, Disneyland parkean korrituko da gaur Tourreko azken aurreko etapa, 63 kilometroko erlojupeko. x



irabazlearen soslaita

TRAVERSONI

x **Jaioteguna:** 1972-4-12, Codogno (Italia).

x **Debuta:** 1996an.

x **Taldeak:** Carrera (1996), Mercatone (1997)

x **Palmaresa:** Atzokoarekin lau garaipen lortu ditu.

x **1995:** Afizientzia izanik, Open mailako Bergamoko Astean etapa bat.

x **1996:** Bigarren Italiako txapelketan.

x **1997:** Setmana Catalanako etapa bat, Tirreno-Adriaticoko etapa bat.

atzoko etapa

0 km: • Irteera 139 txirrindulari hartu zuten.

1 km: • Lehenengo kilometroan Pretotek ihes egin zuen. Oustxakov, Dekker, Voskamp, Henn eta Saligarik berehala bat egin zuten harekin.

5 km: • Sei horiei beste zortzi txirrindulari elkartu zitzaizkien: Sorensen, Simon, Traversoni, Bourguignon, Knaben, Heppner, Ekimov eta Van Pettegem.

13 km: • Hamalau iheslariek minutu bateko aldea ateratzen zioten tropelari. Atzeko tropelean lasaitasuna zen nagusi. Tafi saiatu zen aurrekoekin bat egiten, baina ez zuen lortu.

88 km: • Atzeko tropeletik La Française des Jeux eta Telekom taldeetako txirrindulariak hasi ziren tiratzen, baina berehala etsi zuten.

132 km: • Iheslariek 9.35eko aldea zeukaten.

146 km: • Voskampen eraso. Atzetik Heppner atera zen, eta biek bat egin zuten.

149 km: • Voskamp eta Heppnerrek 50 segundoko aldea zeukaten Etevaux-eko esprint berezian. Tropela 11:45era zihoan.

167 km: • Helmugarako bost kilometro falta zirela, 25 segundoko aldea zeukaten bi iheslariek. Hamabiko multzoan, Sorensen ari zen lanean.

172 km: • Voskamp eta Heppner batera heldu ziren helmugara.

Ekainetik aurrera, Deba Garaiko zerbitzu ofiziala ARRASATEN duzu



MENDIOLA

Araba etorbidea - ARRASATE - 79 20 30

MITSUBISHI
MOTORS

KIA MOTORS

HONDA
AUTOMOBILAK